

UPM sedia rampas emas acara bola jaring



SKUAD bola jaring UPM sudah bersedia untuk memberi cabaran kepada pencabar mereka dalam misi untuk bergelar juara.

SKUAD bola jaring Universiti Putra Malaysia (UPM) melaungkan amaran untuk merampas pingat emas daripada juara bertahan, Universiti Teknologi Malaysia (UTM) pada temasya Sukan Institusi Pendidikan Tinggi (SukIPT) 2016 yang sedang berlangsung di UTM Skudai, Johor.

Jurulatih pasukan, Choo Kon Lee berkata, buat masa ini prestasi kesemua anak buahnya berada di tahap yang baik dan peluang mereka untuk melebur kembali kekecawaan pada edisi lalu juga cerah apabila diperkuatkan lagi dengan barisan

atlet kebangsaan.

"Kita menasarkan untuk sampai ke final selepas terkandas di peringkat suku akhir pada SukIPT 2014.

"Setakat ini, kami melihat hanya UTM yang bakal memberi cabaran sengit memandangkan mereka muncul sebagai juara edisi lalu," ujarnya ketika ditemui semalam.

Tambah bekas jurulatih kebangsaan itu lagi, pasukan bola jaring UPM telah pun menjalani latihan khas selama dua minggu bagi menghadapi SukIPT yang mana sekali gus menambah keyakinannya akan peluang mereka menggondol

emas kali ini.

Barisan atlet kebangsaan yang mewakili UPM kali ini ialah Norashikin Kamalzaman, Siti Nor Farhana Mustafa, Nur Syafazliyana Mohd. Ali, Izyan Syazana Mohd. Wazir serta Nurul Adha Abu Bakar.

Sementara itu, pada hari pertama acara bola jaring semalam, UPM bermula cemerlang apabila menyingkirkan Politeknik Perak dengan 25-4.

Manakala juara edisi lalu, UTM pula dengan rancak membelasah German Malaysia Institute (GMI) dengan pungutan mata keseluruhan 40-2.